



Center da Sport a Zernez - surdatta d'incumbenza

Sülla piazza pro'l Center da Sport a Zernez vain d'inviern fat il glatsch artificial. Per garantir eir in avegnir quista spüerta, sto la piazza gnir sanada. La suprastanza cumünala ha surdat l'incumbenza per ün stüdi da realisabiltà al büro Daniel Wegmüller a Clostra.

Ouvra Electrica Lavinuoz Lavin (OELL SA) - contrat d'acziunaris

Per garantir cha tuot ils acziunaris sajan perinclts cun pussibels müdamaints d'acziunaris, han ils partenaris da la società anonima preparà ün'aggiunta al contrat d'acziunaris, chi regla ils detagls d'ün tal müdamaint. L'aggiunta es gnüda sancziunada.

Turissem - desditta da la convegno tanter Lavin Turissem e'l Cumün da Zernez

La società Lavin Turissem ha desdit sülla fin da l'on 2015 la convegno cul Cumün da Zernez, respectiv cun l'anterior Cumün da Lavin. In üna sezzüda sun gnüdas definidas e scumpartidas las incumbenzas cha'l Cumün da Zernez surpiglia a partir dal 2016. Tanter oter es gnüda reglada la facturaziun da las taxas da cura per la fracziun da Lavin, la gestiun da l'infrastructura turistica sco sendas e loipas ed eir l'organisaziun administrativa dal chomp da battasendas Pradafans. La società Lavin Turissem resta inavant activa e voul prochatschar e promover progets turistics a Lavin.

Cumischiun da turissem - elecziun

Christian Patscheider vaiva demischiunà sco commember da la cumischiun da turissem. Sco successura es gnüda eletta Daniela Stupan.

Planisaziun da quartier Muglinè - proseguimaint

La planisaziun da quartier Muglinè a Zernez es entrada in vigur legala e vala uschè per l'avegnir sper la ledscha da fabrica sco basa legala per fabricats in quist quartier. Sco prossem vegnan fats ils rendaquints dals cuosts da la procedura da planisaziun da quartier. Implü vain realisà il nouv moloc pel ramassamaint da las immundizchas. Per esser pront in cas d'ün pussibel svilup in quist quartier vain tscherchà ün planisader per las lavurs da progettaziun per las investiziuns illa via da quartier ed i'l provedimaint d'aua. La suprastanza ha sancziunà quists prossems pass.

Avertüra e serrada da vias da god e vias champestras d'ürant l'inviern

L'administraziun cumünala es gnüda confruntada cun dumondas da pudair retrar fingià uossa la vignetta 2016 per trafichar sün vias da god e vias champestras. La suprastanza cumünala ha surdat a la direcziun operativa la cumpetenza per decider, cur cha las vias da god e vias champestras dessan gnir drividas da prümvavira ed eir cur cha talas han da gnir serradas d'utuon o d'inviern. Tuot tenor il stadi da la vegetaziun e da l'ora pon las datas variar tanter las singulas fracziuns. Sur da l'avertüra da las vias vain infuormà illas chaistas nairas, sülla pagina d'internet dal cumün e cun trametter las vignettas novas a tuot quels chi vaivan giavüschà da tilla surgnir minch'on automaticamaing.

Fittanzas da parcelas agriculas

Üna persuna s'ha interessada per tour a fit dal cumün parcelas agriculas illa fracziun da Susch. La suprastanza cumünala ha decis da laschar valüter las parcelas al cusgliader agricul e da tillas scriver oura per tour a fit.

Rait electrica - surdatta da lavurs per la staziun da transfuormaziun definitiva in Sosa

La radunanza cumünala dals 1. settember 2015 vaiva deliberà il credit per eriger la staziun da transfuormaziun definitiva in Sosa a Zernez. Sün proposta dal cusgliader cumünal per la rait electrica, sun gnüdas surdattas las seguaintas lavurs als offerents ils plü favuravels: furniziun d'indrizs da mezza tensiun a la Siemens Schweiz AG, Turich; lavurs d'installaziuns electricas a la EE-Energia Engiadina, Scuol; furniziun e montascha da divers indrizs a la Cellpack Power Systems, Villmergen.

Center cumünal Muglinas Susch - surdatta da lavurs

L'anteriura chanzlia cumünala a Susch sco eir l'abitaziun sül plan sura vegnan tuttas a fit a partir d'avuost 2016 da la scoula da pedagogia curativa a Givavaulta. In quel connex han da gnir fats divers adattamaints vi da l'abitacul. L'incumbenza per la furniziun ed installaziun d'ün ascensur es gnüda surdatta a la Garaventa Liftech AG a Küsnacht am Rigi.

Provedimaint da chalur - rimplazzamaint centrala e deposit da ziplas

In connex culla sanaziun dal provedimaint da chalur ha il cumün trat aint offertas per las lavurs dal planisader da s-chodamaint. L'incumbenza es gnüda surdatta al büro Torsten Hartmann a Bonaduz. Cur cha'l planisader da s-chodamaint ha stimà las dimensiuns necessarias da l'abitacul nouv, pon in seguit gnir calculats ils cuosts cumplessivs pel rimplazzamaint da la centrala e dal deposit da ziplas. La dumonda da credit gnarè preschantada ad üna da las prosmas radunanzas cumünalas.

Preproget sanaziun/ingrondimaint chasa da scoula a Zernez

Per prochatschar il proget da la sanaziun respectiv l'ingrondimaint da la chasa da scoula a Zernez, ha la suprastanza cumünala surdat a Jachen Gaudenz, in sia funcziun sco president dal cussagl da scoula, l'incumbenza da manar e coordinar l'elavuraziun dal preproget. Il böt dal preproget es d'avair fin d'utuon 2016 ils cuosts da planisaziun da la sanaziun respectiv da l'ingrondimaint da la chasa da scoula a man dal preventiv 2017.

Pagina d'internet nouva dal Cumün da Zernez

Per pudair proseguir cun las lavurs per crear üna pagina d'internet nouva pel Cumün da Zernez s'ha stuvü augmantar il credit correspondent. Las calculaziuns i'l preventiv 2015 d'eiran massa bassas. L'incumbenza per fabricar sü la pagina d'internet nouva es gnüda surdatta a la firma Spotwerbung da San Murezzan.

Tablas d'infuormaziun digitalas illas fracziuns

La pagina d'internet nouva dal Cumün da Zernez es la basa per realisar las tablas d'infuormaziun digitalas chi sun previsas da montar illas quatter fracziuns. La suprastanza cumünala es da l'avis chi fetscha dabsögn d'avair chaistas nairas illas fracziuns e cha tablas d'infuormaziun digitalas sajan üna fuorma moderna ed innovativa. Da princip va la suprastanza d'accord cun las propostas pels lös e l'apparentscha dals moniturs. Insembel culla pagina d'internet nouva po dimena gnir continuà cun quist proget.

Adattamaints vi da l'organisaziun dal "rinch da maschinas forestalas Engiadina Bassa"

La radunanza cumünala vaiva acceptà als 30 november 2015 il credit da 150'000 francs per fundar il rinch da maschinas forestalas (RMF) Engiadina Bassa. In seguit vaiva il Cumün da Valsot refusà la dumonda da credit per tour part al RMF. La gruppa da proget ha in seguit stuvü surlavurar ils statüts e fat la proposta da fundar il RMF tanter ils Cumüns da Scuol e Zernez. Implü ha la gruppa da proget propuonü da desister oramai sün la cumpra d'ün "bagger cun processur" uschè cha la partecipaziun finanziaria dal Cumün da Zernez importa be plü 100'000 francs. La suprastanza ha approvà ils statüts e l'adattamaint dal credit d'investiziun.